


He Whakaparahako

Nā Peti Nohotima

Whatukura

He Whakatau

Me mātua pānui kia mārāma rawa koe i ngā whārangi 8–14 o tēnei pukapuka.



He whakarāpopoto

Pānuihia te whakarāpopoto ki te ākonga.

Āe mārika. He pai noa iho te rerekē. Nō reira, e tika ana kia whakahētia, kia kaitāia koe e tētahi kē atu nā te mea he kōrero nōu i tōu reo ake i roto i tōu whenua ake? Me aha te whānau nei?

He kupu whakataki

Kia kaha ki te whakamahi i ngā wheako, me ngā mōhio o ngā ākonga. Kia hāngai tonu te whakatenatena, ki te whakauru i ngā ākonga katoa. Me whakatitina rawa te pūkenga tiro whakamua. Matapakihia ngā kupu hou me mahi rawa te kupu taka me ngā whakaahua kei te uhi. Me whakamaumahara hoki te ākonga kia pātai ki a ia anō, i te wā e pānui ana ia mai i te tīmatanga ki te mutunga o te pānui.

Matapakihia ētahi āhuatanga e mōhio ana ngā tamariki i pā ki ā rātou mō tētahi mahi whakaparahako, mahi whakaiti. Kia kaha tonu ki te āta poipoi te wairua o te kaikōrero. Ka pēhea koe pēnā tokoiti noa iho ngā tāngata i kōrero i tō reo? Ina rongo koe i tētahi reo rerekē mai whenua kē ka aha koe? Me matapaki te kiānga nei “He pai noa iho te rerekē.” Whakaritea ētahi ariā hei tautoko i te tamaiti he reo kē atu tōna.

He Matapaki

Tirohia te pai o te pānui a te ākonga

I te wā o te matapaki me pānui te ākonga i te katoa, i tētahi wāhanga noa iho rānei o te pukapuka ki a koe. Kātahi ka:

- whakanui, āta tatari, whakahau tika;
- titiro mēnā e tika ana, e pai ana hoki (mā te tataui i ngā hē), te rere o te reo;
- titiro mēnā e mārāma ana mā te whai i tētahi o ngā huarahi e whai ake nei;
 - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
 - te pātai mō tētahi āhuatanga o te pakiwaitara, arā, te kaupapa, te ritenga, ngā ariā mātua, te raupapatanga, ngā kiripuaki;
 - te whakatenatena i te ākonga mō tana tiro ki mua i whakaputa ai ia i te wā o te whakataki.

Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te mihini whitireo, i tōna kotahi rānei;
- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.

He whakapuaki māramatanga

1. He aha ngā tamariki i kata ai, i kapekape ai i a Peti rāua ko Asa?
2. He aha te kōrero whakatau a Te Whirimako ki a Peti?
3. He aha a Te Whirimako i ki ai he waimarie a Peti rāua ko Asa?
4. He aha te huarahi ka whai koe mēnā ka whakararu ana tētahi i a koe?
5. Me pēhea tō āwhina i tētahi mēnā he reo kē atu tōna?

Ngā whakautu ki ngā whakapuaki māramatanga

1. He kōrero Māori nō rāua.
2. He waimarie kōrua nō te mea e rua o kōrua reo.
3. Kei te haere mai te wā kua pīrangi ōna tamariki me ētahi atu kia rite rātou ki a kōrua.
4. He maha ngā whakautu rerekē.
5. He maha ngā whakautu rerekē.

He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te He Tirohanga Whānui mō ngā tino āhuatanga o te pukapuka nei.

Te pūtake

T He tuhi i ngā kupu mamae i roto i tētahi reta.

He whakatakinga ā-roro, he whakaharatau

Kei ētahi kōrero he whakaatu i te tino āhua o te tangata ki te tangata pēnā he rerekē tētahi kē atu. Mā ngā wheako tonu o te ākonga, me te whakawhitiwhiti e mōhio ai te ākonga. Kei ētahi titiro, ētahi kata, ētahi kupu tētahi tino whakaputa mamae. Me tautuhi te mamae i puta i te kōrero paki nei, kātahi ka matapaki ai i pēhea te whakatau i taua mamae. Me whakarite he aha atu anō tētahi huarahi hei tino whakatau i te mamae.

Mā te tuhi reta hei whakawhiti i te mamae. Me matapaki rawa te anga tuhi reta, arā, tuatahi, ko te wāhi noho o te kaituhi e whakaatu ana i te wāhi kei reira tōna kāinga me te wā. Me tuhi tēnei i te kokonga i te taha mauī o runga. Tuarua, he mihi mahana pēnā he hoa, he whanaunga rānei. Tuatoru, ko te puku o te reta e whakaatu ana i te tino kaupapa mamae, arā, i ahatia? Nōnahea? Ko wai i reira? Me te whakatau, nā wai? I pēhea? Tuawhā, ko te whakamutunga. Mā te whakaatu o te ākonga i tana hononga tētahi momo whakatau pai.